



SIARAN SERTA MERTA

MOTAC.100-2/1/18 JLD4 (24)

KEMENTERIAN PELANCONGAN, SENI DAN BUDAYA

SIARAN MEDIA

MOTAC PERHEBATKAN PELANCONGAN MESRA MUSLIM

12 Oktober 2023 – YB Dato Sri Tiong King Sing, Menteri Pelancongan, Seni dan Budaya (MOTAC) hari ini menegaskan bahawa Malaysia mempunyai kelebihan tersendiri dalam membangunkan pelancongan mesra Muslim. Oleh itu, MOTAC bercadang melancarkan pakej Pelancongan Mesra Muslim seawal November 2023.

YB Menteri berkata, memandangkan Timur Tengah dan China mempunyai demografi yang besar khususnya Muslim. Justeru, MOTAC bersedia untuk bekerjasama bagi membangunkan pakej pelancongan mewah yang kreatif dan menarik seperti pelancongan golf, perubatan dan sebagainya. Sehubungan itu, MOTAC dan Pusat Pelancongan Islam (ITC) akan membuat perancangan

segera berhubung perkara ini dan mampu dicapai melalui Lembaga Penggalakan Pelancongan Malaysia (Tourism Malaysia) yang membuat pemasaran di Asia, Timur Tengah dan Eropah.

YB Menteri juga memohon agar pihak yang terlibat mengadakan kursus dan latihan dalam bulan ini (Oktober 2023) dengan menyasarkan penglibatan sekurang-kurangkan 200 orang peserta untuk mendapatkan sijil yang berkaitan.

Katanya lagi, “kursus ini bertujuan untuk memberi pendedahan kepada pemain industri pelancongan mengenai pasaran pelancongan Muslim yang memerlukan perhatian dalam menentukan pakej yang bersesuaian dan kompetitif untuk dijual di pasaran berkaitan.”

Hari ini YB Menteri bertemu dengan wakil Persatuan Penggalakan Pelancongan Inbound Cina Malaysia (MICA), Persatuan Ejen-Ejen Pelancongan dan Pengembaraan Malaysia (MATTA), Persatuan Pelancongan Domestik Malaysia (MITA), Persatuan Syarikat Pengendalian Pelancongan Bumiputera Malaysia (Bumitra Malaysia) dan Persatuan Pelancongan Cina Malaysia (MCTA). Dalam

pertemuan ini, perbincangan mengenai beberapa perkara yang berkaitan dengan industri pelancongan negara, termasuk kaedah untuk memperhebatkan promosi diperingkat antarabangsa, membangunkan pasaran mesra Muslim, mewujudkan konsensus industri, memberikan subsidi dan bantuan kepada pengusaha pelancongan serta lain-lain lagi.

MOTAC akan memberi perhatian yang sama rata kepada semua pemain industri pelancongan di negara ini tanpa mengira latar belakang dan tidak timbul isu berat sebelah dalam menyalurkan bantuan kepada mana-mana pihak. MOTAC juga komited untuk membantu dan menyokong ekonomi pelancongan dalam usaha memajukan ekonomi negara. Justeru itu, MOTAC berharap agar semua pemain industri dapat bekerjasama dengan lebih erat dan bersaing secara sihat, tanpa bertindak melulu semata-mata untuk kepentingan diri sendiri.

YB Menteri juga mengingatkan jika industri pelancongan dimonopoli dengan perasaan benci dan persaingan tidak sihat, nescaya ekonomi negara akan menguncup dan akan mengambil masa yang lama untuk dikembangkan semula.

Selain itu, YB Menteri berkata baru-baru ini terdapat aduan mengenai layanan tidak mesra terhadap pelancong di beberapa lokasi tarikan pelancongan seperti di Jalan Alor. Aduan yang diterima adalah peniaga tempatan meletakkan harga barangan yang tidak masuk akal kepada pelancong asing, termasuk harga makanan dan minuman yang mencecah sehingga tiga ke empat kali ganda lebih tinggi daripada harga biasa. Tindakan peniaga yang tidak jujur ini turut memberi kesan buruk kepada sektor pelancongan negara dan akan membawa kepada penurunan jumlah pelancong untuk datang ke Jalan Alor.

Tegasnya lagi, tingkah laku sebegini hanya akan memberi kesan negatif kepada Malaysia sebagai destinasi pelancongan yang popular selain memudaratkan kepentingan pelancong dan mampu merosakkan reputasi industri pelancongan Malaysia.

Malah, tindakan peniaga itu juga menyalahi undang-undang dan YB Menteri memberi amaran kepada pemain industri yang berkaitan untuk memberi perhatian dan penelitian terhadap isu-isu seperti ini. YB Menteri juga menyeru persatuan dan agensi berkaitan pelancongan membantu membangkitkan apa juga isu yang timbul

berhubung pelancongan. Jika sesuatu isu itu dapat dikenalpasti dengan lebih awal, maka lebih mudah untuk kita mengambil langkah penyelesaian bagi memastikan para pelancong dapat merasai pengalaman manis sepanjang berada di Malaysia.

Dikeluarkan oleh:

Unit Komunikasi Korporat

KEMENTERIAN PELANCONGAN, SENI DAN BUDAYA (MOTAC)

Tel: 03-8000 8000 Fax: 03-88917181

Website: www.motac.gov.my Email:

info@motac.gov.my Facebook, Instagram & Twitter:

@mymotac